

समे – 12:25

<><><><><><>

President Murmu

राष्ट्रपति द्रौपदी मुर्मू हुंदा अज्ज जन्मदिन ऐ। इस मौके पर आकाशवाणी समाचार आस्सेआ साबका केन्द्री मंत्री स्मृति ईरानी हुंदे नै राष्ट्रपति हुंदी विशेष भेंटवार्ता दा प्रसारण कीता गेआ। राष्ट्रपति होरें आकाशवाणी कन्नै खास इंटरव्यू च अपनी जीवन यात्रा सांझी कीती। उनें दस्सेआ जे कियां उनें ओडिशा सरकार दे सिंचाई विभाग च इक जुनियर असिस्टेंट ते रायरंगपुर च श्री अरबिंदो संगठित शिक्षा ते शोध केन्द्र च अध्यापक दे तौर पर बी कम्म कीता। उनें झारखंड च पैहली महिला गवर्नर दे तौर पर बी अपनियां सेवा दित्तियां। राष्ट्रपति मुर्मू होरें गलाया जे शिक्षा इक बड़ा गै नेक पेशा ऐ ते ओह इसी सब्बने शा अव्वल कम्म मन्नदियां न। बक्ख-बक्ख खेत्तरें च कीते गेदे कम्मं बारे पुच्छे जाने पर उनें आखेआ जे असेंगी अपने हालात स्हाबै अपने आपा गी ढाली लैना लोडचदा ऐ। राष्ट्रपति दे औहदे लेई मेदवार दे तौर पर चुने जाने बारे उनें गलाया जे एह खबर सुनियै उंदे ग्रां दे लोक मते खुश होई गे हे।

<><><><><><>

President Wishes

उपराष्ट्रपति जगदीप धनखड़ होर ते उंदी घरै आली डॉ. सूदेश धनखड़ होरें अज्ज राष्ट्रपति द्रौपदी मुर्मू हुंदे कन्नै मिले ते उनेंगी जन्मदिन दी ममारकबाद दित्ती। इक सोशल मीडिया पोस्ट दे राएं जगदीप धनखड़ होरें लोकें दी जिंदगी च राष्ट्रपति हुंदे योगदान उप्पर लोह पाई। उपराष्ट्रपति होरें उंदी लम्मी, खुशहाल ते तंदरूस्त जिंदगी लेई बी दुआ कामना कीती। उनें गलाया जे राष्ट्रपति मुर्मू हुंदा राष्ट्र दी सेवा प्रति योगदान सब्बै गी प्रेरित करदा ऐ। प्रधानमंत्री होरें गी गलाया जे उंदा गरीब तबकें लेई खास ध्यान सराहने योग ऐ। मोदी होरें गलाया जे राष्ट्रपति मुर्मू हुंदा जीवन लक्खें-करोड़ें लोकें गी प्रेरित करदा ऐ। उनें इब्बी आखेआ जे भारत हुंदे अनकथें जतनें ते दिव्यदर्शी नेतृत्व लेई आभारी रौहग। राष्ट्रपति मुर्मू अज्ज अपने जन्म दिन दे मौके पर नमीं दिल्ली दे जगननाथ मंदर गोइयां ते इक सोशल मीडिया दी पोस्ट दे राएं उनें आखेआ जे ओह इस मुल्खै दे लोकें दी भलाई बेह्तरी लेई कामना करदियां न।

<><><><><><>

PM-Visit

प्रधानमंत्री नरेन्द्र मोदी होर अज्जै थमां दऊं दिनें दे दोरे पर जम्मू कश्मीर आ'रदे न। जिस दरान ओह डेढ ज्हार करोड़ रपे दिएं विकास परियोजनाएं दा नीह पत्थर ते उद्घाटन करगंन। प्रधानमंत्री होर श्रीनगर च नोजवानें गी सशक्त करने ते जम्मू कश्मीर च बदलाव आन्नने लेई आयोजित इक कार्यक्रम च शामिल होंगन। मोदी होर 2 ज्हार थमां मते नोजवानें गी जिंदियां हाल च नौकरियां लगियां न, उनें गी नियुक्त पत्र तकसीम करगंन। मोदी होर 1 ज्हार 8 सौ करोड़ रपे दी कृषि सुधार लेई मकाबलेबाजी आली परियोजना दी बी शुरुआत करगंन कल 21 जून गी प्रधानमंत्री 10में अंतर्राष्ट्रीय योग दिवस दे मौके आयोजित समारोहें दी अगुवाई, श्रीनगर थमां करगंन। ओह उत्थें लोआए जाने आले शिविर च हिस्सा लेंगन ते मजूद लोकें गी संबोधत बी करगंन।

<><><><><><>

Encounter Baramulla

बारामुला जिले च कल छिड़े दे इक टाकरे च दऊं आतंकवादी मारे गे न ते दऊं सुरक्षा कर्मिं दे घायल होने दी खबर ऐ। जिले दे वाटरगाम इलाके च आतंकवादिं दी मजूदगी बारे इक टकोहदी सूह थोने पर सुरक्षा बलें इलाकें गी घेरियै इक तुपाई अभियान चलाया जिसलै सुरक्षाबलें घेरा तंग कीता, तां उत्थें छप्पे दे आतंकवादिं उंदे पर अन्नेबाह गोलियां चलाना शुरु करी दित्ता। एहदे पर जवाबी कारवाई मगरा टाकरा भखी पेआ। पुलसै दे इक वरिष्ठ अफसर नै जानकारी दित्ती ऐ जे टाकरे च दऊं आतंकवादी मारे गे न, जिदियां लोथां बी बरामद करी लैतियां गेइयां न। अजें कि उंदी पंछान ते उंदा ताल्लुक केहड़े आतंकी संगठन कन्नै हा, एहदा पता लाने लेई पड़ताल कीती जा'रदी ऐ। उनें दस्सेआ जे इक पुलसै दा इक जवान ते इक सैनिक जख्मी होआ ऐ।

<><><><><><>

Reasi Arrest

9 जून गी रियासी च होए दे आतंकी हमले, जेहदे च 9 श्रद्धालु मारे गे हे, आले मामले च पुलसै गी इक बड्डी कामयाबी हासल होइ ऐ। पुलसै 45एं ब'रे दे हाकम नां दे इक आदमी

गी रियासी च गिरफ्तार कीता ऐ जेहड़ा दस्सेया जा'रदा ऐ जे आतंकवादिएं लेई कम्म करदा हा उनेंगी इक गाइड दे तौरा पर मदद करदा हा, उंदे लेई रूट्टी, पानी ते ठैहरने दी बवस्था करदा हा।

<><><><><><>

Chaprari Tributes

डीडीसी अध्यक्ष, डोडा धनन्तर सिंह कोतवाल होरें चपनारी हत्याकांड च मारे गेदे लोकें गी इक श्रद्धांजलि समारोह च पुष्पांजलि भेंट कीती। 19 जून 1998 च आतंकवादिएं 26 बरातिएं गी अपना शकार बनाया हा। इस श्रद्धांजलि समारोह च उपाध्यक्ष संगीता रानी सनें केई गणमान्य बसनीक मजूद हे। मजूद लोकें मारे गेदे लोकें आस्तै प्रार्थना कीती। पूरी सिंह राणा ते रछपाल सिंह होरें सारेंगी इकजुट्ट होइयै आपसी भाईचारा बनाइयै रखने आस्तै आखेआ तां जे कुसै चाल्ली दी बी मुश्कलातें दा सामना करना असान होई सकै।

<><><><><><>

Jatinder Singh

केन्द्रीय मंत्री डॉ. जितेन्द्र सिंह होरें अज्ज नमीं दिल्ली च भारतीय लोक प्रशासन संस्थान यानि आईआईपीए कैंपस च लगातार त्रीह बारी आईआईपीए उदे राष्ट्रीय अध्यक्ष दा कार्यकाल संभालेआ। उनें इस कैंपस च 2 स्मार्ट कांफ्रेंस हालें दा बी उदघाटन कीता। सांईस एंड टैक्नालोजी दे केन्द्रीय राज्यमंत्री पृथ्वी विज्ञान दे केन्द्रीय राज्यमंत्री(स्वतंत्र प्रभार), प्रधानमंत्री दफतरै दे एमओएस कार्मिक सार्वजनिक ते पिनशने दे मंत्री जितेन्द्र सिंह होरें गलाया जे स्मार्ट कांफ्रेंस हाल प्रधानमंत्री हुंदे अमृतकाल दे सुखने गी पूरी करने दे बत्ते उप्पर पुट्टी गेदी गैह दा कम्म करोग। इनें दो कांफ्रेंस हाल बनने कन्नै कल 9 हाल होई गे न, जेहदे कन्नो कन्नी केई सेमिनार करोआए जाई सकदे न ते सिखलाई होर गुणवत्तापूर्ण बनी जाग। इस मौके पर बोलदे होई मंत्री होरें इस संस्थान दी तनदेही दे वचनबद्धता आले कम्म करने लेई सिपत बी कीती।

<><><><><><>

Govt. MSP

केन्द्री सरकार नै 14एं फसलें लेई घट्टोघट्ट समर्थन मुल्ल बधाने दा फ़ैसला लैता। सूचना प्रसारण मंत्री अश्विनी वैष्णव होरें नमीं दिल्ली च आखेआ जे सरकार नै मंत्रिमंडल दी बैठक च 5 बड्डे फ़ैसले लैते न, जिदं चा इक फसलें दा घट्टोघट्ट समर्थन, मुल्ल बधाना बी शामिल ऐ। उनें आखेआ जे कैबिनेट नै 14एं फसले पर 2024–25 ब'रे लेई खरीफ फसलें लेई घट्टोघट्ट समर्थन मुल्ल एमएसपी गी मजूरी दित्ती ऐ। उनें आखेआ, मुंजी, कपाह, बाजरा, दालें ते तिलें लेई घट्टोघट्ट समर्थन मुल्लै च खरा मता बाद्धा करसानें गी लाह पुजाग। उनें एह बी दस्सेआ जे सरकार मुल्ल भरै च 2 लक्ख गोदाम बनाने पर बी कम्म करा'रदी ऐ।

<><><><><><>